

VIR Excellentissime, Amplissime,

PATER Optime,

Quod solet saepe iis accidere, qui varia velint atque inter se diuersa conciliare, vt nulli satisfaciant, id vereor, ne mihi hoc tempore accidisse videatur. Cogitanti enim mihi et perquirenti, quo possem modo et summam meam erga TE, *Optime Pater*, significare, vti par est, pietatem, et aliorum qualemcunque fouere de me aut opinionem aut voluntatem aut expectationem, et meis denique simul tum in patriam, tum in litteras elegantiores obsequi studiis: placuit ea fortasse ratio, qua deseruisse potius officium erga patrem, in alios humanitatem violasse neque meam ipsius utilitatem satis adiuuisse existimarer. Neque diffiteor, diu me multumque haesitasse, vtrum haec, quae iam edere animus est, ex commentariolis meis inchoata ac rudia puer atque adolescentulus excidere paterer, an prudentius maturitati reseruarem. Quod et meae suadere tenuitatis conscientia, et aliorum de meo conatu iudicium videbatur. Sed vicit huius diei, laetissimi, cuius causa scribendum opinabar, recordatio, apta, vt arbitrator, ad id, quod maxime exopto, vt, nisi omnes, TV certe, *Optime Pater*, iique cuncti, qui TE amant, (sunt autem plures) veniam darent, si animo aliquando, quam quae facultate sustinerem,